

TEKS UCAPAN DEWAN MENGENAI PELAN PEMULIHAN EKONOMI

Pakej Rangsangan Ekonomi ke 3: Menyemarak Kebinglasan Rakyat Memacu Kesejahteraan Negeri.

MUKADIMAH

Tuan Speaker, ahli-ahli dewan dan rakyat negeri Selangor,

1. Pada 11hb Mac 2020, Pertubuhan Kesihatan Sedunia (WHO) telah mengisytiharkan COVID-19 sebagai suatu pandemik. Ketika itu kita masih terpinga-pinga, tertanya-tanya, apakah kesan sebenar pandemik tersebut ke atas kehidupan kita semua. Sempadan mula ditutup. Pergerakan laut, udara dan darat dihentikan. Aktiviti sosial dan ekonomi satu dunia tergendala.
2. Wabak COVID-19, dikenal pasti pertama kalinya di negara ini pada 25 Januari 2020. Pada bulan Febuari kita hanya mencatatkan 22 kes positif. Pada pertengahan bulan Mac kes melambung 20 kali ganda kepada 428 kes.

3. Kes pertama jangkitan COVID-19 di Selangor telah dicatatkan pada 3 Februari 2020. Sehingga 12 Julai 2020, Selangor mencatat 2008 kes terkumpul, 1884 kes sembuh serta 24 kematian.
4. Justeru untuk menghalang serta mengawal wabak tersebut, Kerajaan Malaysia telah memperkenalkan Perintah Kawalan Pergerakan pada 18hb Mac 2020.
5. Perniagaan dan perkhidmatan yang ditakrif sebagai tidak mustahak diarahkan tutup. Pergerakan antara negeri juga tidak dibenarkan.
6. Penutupan dan pemberhentian segala aktiviti tersebut juga memaksa pemilik perniagaan terutamanya perniagaan kecil dan sederhana memberhentikan pekerja-pekerja. Menjelang bulan April, Jabatan Perangkaan Malaysia mencatatkan kadar pengangguran meningkat sebanyak 5% bersamaan 778,800 orang, kadar ini merupakan kadar tertinggi semenjak tahun 1990.
7. Bank Negara pula menjangkakan pertumbuhan KDNK tahun hadapan hanya sekitar -2.0 sehingga 0.5 peratus. MIDA (Lembaga Pembangunan Pelaburan Malaysia) menjangkakan penguncupan KDNK tahun 2020 akibat pandemik ini dijangkakan adalah sekitar RM 38 billion sehingga RM 102 billion.

8. Sudah tiba masanya kita bersama-sama memikirkan suatu pelan pemulihan ekonomi pasca pandemik, yang bertujuan menghalang terjadinya ***“the dislocation of the entire fabric of Malaysia’s economy.”***

9. Kita bertanggungjawab untuk berusaha keras demi menyemarakkan semula ekonomi negeri kerana Selangor merupakan, dengan izin, *economic reactor* atau reaktor ekonomi Malaysia. Akan tetapi pandemik ini juga memaksa kita untuk memikir, melihat semula serta mencari penyelesaian terhadap kesenjangan ekonomi dan kesannya terhadap mereka yang berpendapatan rendah, golongan B40, mereka yang mendapat gaji harian dan kepentingan untuk melindungi mereka pada waktu begini.

10. Mutakhir ini, Jabatan Perangkaan Malaysia merakamkan bahawa terdapat peningkatan kesenjangan pendapatan (income disparity) di mana melalui ukuran Gini Coefficient, jurang antara yang kaya dengan yang berpendapatan rendah semakin melebar sebanyak 0.008 dari 0.399 kepada 0.407. Makanya tidak hairanlah kadar Pendapatan Garis Kemiskinan telah disemak semula dari RM 980 kepada RM 2,208.

11. Berdasarkan ukuran terbaharu ini bermaksud jumlah isi rumah yang dikategorikan miskin dianggarkan sebanyak 405,441, suatu peningkatan mendadak dari jumlah tahun 2016 iaitu hanya sekitar 24,700.

12. Ini semua memerlukan kita untuk bergulat memikirkan pembangunan ekonomi negara secara total!

13. Waima demikian saya yakin kita semua akan keluar dari episod ini gilang gemilang jika kita bersama-sama sebagai rakyat Malaysia, tidak mengira kaum dan agama, dari Kangar hingga ke Tanjung Piai, dari Pengkalan Kubor Tumpat hingga ke Kapit, dari Baram hingga ke Kundasang, terus berusaha keras, berdisiplin dan bersedia menerima beberapa tabiat baharu atau 'the new normal' menjadi sebahagian dari kebiasaan.

14. Oleh itu, adalah mustahak pada pandangan saya kita jangan sesekali menyempitkan takrif *new normal* hanya sekadar memakai pelitup muka dan amalan mencuci tangan. Norma baharu haruslah mencakupi suatu ikhtiar rekonstruksi pemikiran politik dan ekonomi yang jitu, jujur, telus dan turut menumpukan perhatian terhadap menyemarakkan kebingkasan rakyat, dengan izin, *people's resilience*.

15. Berhadapan dengan segala kemungkinan termasuklah kemungkinan kemelesetan ekonomi, pemulihan ekonomi mesti mengambil kira dampaknya terhadap rakyat terbanyak yang berpendapatan rendah.

16. Sudah pasti kita mahu perniagaan semakin ligat, pelabur terus melabur di Selangor dan industri tetap kukuh serta stabil. Itu adalah komitmen Kerajaan Negeri Selangor. Saya berani menyatakan di sini kita adalah Kerajaan Pro Pembangunan dan Kemajuan. Kita adalah Kerajaan Pro Peniaga. Kita adalah Kerajaan Pro Rakyat, kita adalah kerajaan untuk semua.

17. Izinkan saya mengutip tulisan ahli ekonomi tersohor dan perintis idea kewujudan Sistem Bretton Woods, John Maynard Keynes yang berjudul *The Economic Consequences of the Peace* yang diterbitkan pada 12 Disember 1919. Keynes mengkritik keras hasil persidangan tersebut yang menekan Jerman selepas kekalahan negara itu pada Perang Dunia Pertama.

18. Tekanan tersebut pada pandangan Keynes menghancurkan maruah serta jati diri rakyat Jerman. Beliau menyebut, ***“the future life of Europe was not their concern; its means of livelihood was not their anxiety”***. Justeru kita tidak boleh sama sekali, sementara memacu semula ekonomi negeri, mengabaikan keresahan serta kesusahan rakyat terbanyak.

19. Pertumbuhan ekonomi dan pembangunan bukan bermakna menyisihkan rakyat susah. Kita memusuhi kemiskinan bukannya memusuhi orang miskin!

20. Saya menggesa agar kerajaan dan sektor perniagaan menggembeng usaha bersama untuk menyemarakkan semula kebingkasan rakyat Selangor.

21. Apabila rakyat negeri ini bersemangat untuk menggerakkan ekonomi negeri, ketika itulah juga ekonomi negeri serta negara akan berada di landasan yang tepat menuju pemulihan dan kegemilangan.

22. Kita wajar menyedari untuk menyelamatkan perniagaan, industri dan ekonomi, penamatan kerja bukanlah satu-satunya jalan keluar.

Tuan Speaker,

23. Manakala itu sepanjang Perintah Kawalan Pergerakan kita pastinya menyedari kepentingan sumber air bersih, berhemah menggunakan tenaga elektrik, bahawa waktu yang diluangkan bersama keluarga lebih berharga berbanding melepak di gerai ataupun kedai makan. *The new normal* mendesak negara dan masyarakat agar mulai serius dengan cabaran perubahan iklim, *food security* dan dasar lainnya serta mulai merangka polisi bersesuaian untuk menangani isu-isu tersebut.

24. Saya difahamkan berkurangnya jejak karbon sepanjang PKP kerana kurangnya kenderaan di atas jalanraya. Ini menunjukkan bahawa ianya bukan mustahil untuk dilaksanakan. Bukan mustahil untuk kita menumpukan sumber untuk membina rangkaian pengangkutan awam yang berkesan.

25. Sektor pertanian dan penghasilan bahan makanan perlu difikirkan dalam kerangka strategik utama. Krisis ini perlu menjadi suatu kejutan kepada kita bahawa kita tidak mampu lagi bergantung kepada negara luar untuk sumber makanan. Krisis ini mendesak kita untuk melihat kepada inovasi dan teknologi baharu yang sedang dan akan tercipta untuk menjadikan negara 'food independent'.

Speaker dan Ahli Dewan sekalian,

26. Negeri Selangor tidak punya pilihan lain melainkan menjadi peneraju yang merintis jalan kemajuan ini. Demi merealisasikan cita-cita ini kita memerlukan sokongan setiap individu, setiap institusi serta agensi kerajaan dan pentingnya Kerajaan Negeri mempunyai hubungan simbiotik yang profesional dengan Kerajaan Pusat demi kebaikan rakyat Negeri Selangor khususnya.

27. Kita sudah menyaksikan bagaimana rakyat Malaysia se-ia, sekata, sehati, sejiwa berdepan dengan penularan COVID-19. Ternyata aset terhebat negara ini adalah rakyatnya yang berbilang kaum. Kekuatan ini, Insya-Allah, akan membolehkan kita menangani penularan COVID-19 dan seterusnya berikhtiar memulihkan ekonomi negara.

28. Kerajaan Negeri Selangor semenjak bermulanya penularan wabak COVID-19 memandang serius tentang kesannya kepada rakyat Negeri Selangor. Alhamdulillah, sebagai sebuah kerajaan yang prihatin, Kerajaan Negeri Selangor telah menjangkakan kesan penularan COVID-19 ini bukan sahaja akan memberi kesan jangka pendek kepada kehidupan rakyat tetapi juga jangka panjang.

29. Kerajaan Negeri menerobos ruang kolaborasi pintar segenap arah, yang menyaksikan Selangor menjadi satu-satunya negeri yang mempunyai Pasukan Petugas Covid-19 yang diketuai oleh Ahli Parlimen Kuala Selangor, YB Datuk Seri Dr. Dzulkefly Ahmad dan barisan tokoh lain yang terus bertungkus lumus sehingga ke hari ini dalam mencetus inisiatif proaktif dalam usaha Selangor terus menggempur COVID-19.

30. Ke arah mendepani gerak kerja tersebut, Selangor juga meneroka langkah menjadi Negeri terawal menubuhkan Bilik Gerakan COVID-19 yang diketuai oleh Timbalan Setiausaha Kerajaan Negeri (Pengurusan), Dato' Zamani Ahmad Mansor. Di mana melalui Bilik Gerakan inilah, beberapa Tatacara Operasi Standard (SOP) pengurusan Pusat Kuarantin dapat dicetuskan dan kemudiannya dijadikan panduan pelaksanaan di beberapa lokasi lain di Malaysia.

31. Ini seterusnya memperkemas sinergi agensi Kerajaan Negeri dan juga agensi Persekutuan seperti Majlis Keselamatan Negara (MKN), Agensi Pengurusan Bencana Negara (NADMA) Jabatan Perdana Menteri dan lain-lain agensi dalam gerak kerja menyelaras pelaksanaan Perintah Kawalan Pergerakan Diperketatkan (PKPD) seperti di Sungai Lui, Selayang Baru, Jalan Othman dan terakhir di Kuala Langat.

32. Persefahaman erat ini juga diterjemah melalui Sidang Khas Bilik Gerakan yang melibatkan sesi sumbang saran melibatkan semua Pegawai-pegawai Daerah dan Datuk Bandar/Yang Dipertua Pihak Berkuasa Tempatan di seluruh Selangor, sehingga Selangor pernah 'dicuit' walhasil pelaksanaan Perintah Kawalan Pergerakan Bersyarat Diubahsuai (PKPBD) yang akhirnya turut diperakui keberkesanan pelaksanaannya sehingga turut diikuti beberapa negeri lain di Malaysia.
33. Selangor juga terus melakukan terobosan melalui pengenalan SELangkah, sistem pendaftaran akses keluar-masuk di premis-premis kerajaan, perniagaan dan individu yang boleh dianggap sistem paling praktikal dalam melaksanakan Penjejakan Kontak berbanding sistem seumpamanya di Malaysia.
34. Terobosan-terobosan ini jelas memperlihatkan bagaimana Selangor boleh dianggap selaku Frontline State dalam mendepani upaya dan ikhtiar dalam menggempur COVID-19, dan aktor terpentingnya tidak lain tidak bukan: sekalian petugas baris hadapan dan penjawat awam Negeri Selangor.
35. Sekalung apresiasi dan tabik hormat saya, mewakili seluruh rakyat Negeri Selangor, untuk didedikasikan buat seluruh penjawat awam pentadbiran Kerajaan Negeri dari Pentadbiran SUK Selangor hingga ke peringkat daerah dalam memastikan agenda menggempur COVID-19 ini dapat direalisasikan ke tahap terbaik.

36. Marilah sekalian Ahli-ahli Yang Berhormat untuk kita sama-sama bangun berdiri menzahir tanda apresiasi kita kepada semua petugas baris hadapan dan penjawat awam Negeri Selangor.

Ahli-ahli Dewan yang mulia,

37. Bagi mendepani kesan wabak ini dengan serius, Kerajaan Negeri telah melaksanakan dua Pakej Rangsangan Ekonomi Selangor Prihatin. Bagi fasa pertama, bantuan kewangan diberikan secara terus kepada rakyat dan wira barisan hadapan petugas kesihatan, keselamatan dan media pada peringkat awal Perintah Kawalan Pergerakan supaya dapat *weather the storm*, atau *to cushion the impact*.
38. Bagi fasa kedua pula, usaha tambahan bagi menangani isu-isu sosial ataupun *social impact* serta usaha ekonomi seperti Selangor Agro Market, Selangor E-Kitchen dan Selangor Advance bagi mengadaptasi kepada norma baharu kehidupan kita.

39. Sehingga hari ini, Kerajaan Negeri telah membelanjakan sebanyak RM260,144,464.54 (Dua Ratus Enam Puluh Juta Satu Ratus Empat Puluh Empat Ribu Empat Ratus Enam Puluh Empat Ringgit Lima Puluh Empat Sen) yang memberi manfaat kepada 3.5 juta rakyat negeri Selangor ataupun 54% dari jumlah keseluruhan rakyat Negeri Selangor.
40. Struktur ekonomi Kerajaan Negeri pasca COVID-19 akan mengadaptasikan perubahan dan pendekatan baru dari segi sistem dan pelaksanaannya. Sehubungan itu, bagi menampakan kejatuhan pasaran dan membangunkan semula ekonomi Negeri Selangor, Kerajaan Negeri merancang untuk memperkenalkan Pakej Selangor Prihatin Fasa Ketiga. Pelaksanaan Fasa Ketiga ini adalah sebagai satu daya tahan atau *economic resilience* untuk Negeri Selangor membangunkan semula ekonomi setelah mengalami kejutan secara mendadak susulan penularan pandemik COVID-19 yang tidak pernah dijangkakan oleh mana-mana pakar ekonomi dunia sekalipun.
41. Untuk itu, di bawah Fasa Ketiga ini, Kerajaan Negeri akan membangunkan Pelan Pemulihan Ekonomi Selangor yang menekankan kepada tiga tonggak utama dalam menangani impak COVID-19. Pertama, Jaminan Bekalan Makanan (*food security*), Kedua, Kemampanan Ekonomi ataupun ***economic sustainability*** dan Ketiga, Pembangunan Keupayaan ataupun *capacity building*.

Jumlah keseluruhan nilai ekonomi bagi Pelan Pemulihan Ekonomi Selangor ini ialah RM 55.85 bilion.

TONGGAK PERTAMA - Keselamatan Makanan (Food Security)

42. Kelangsungan sumber makanan menjadi tajuk yang sangat kritikal tatkala pandemik ini bermula di mana buat pertama kalinya berlaku renjatan terhadap aktiviti ekonomi dalam tempoh yang relatif panjang. Walaupun secara umumnya, bekalan makanan di negara ini stabil dan rakyat tidak mengalami masalah untuk mendapatkan sumber makanan sepanjang tempoh PKP, namun ini tidak seharusnya membuatkan kita leka tanpa perancangan jangka panjang yang mengambil kira secara holistik berkaitan dengan pengeluaran sumber makanan, rangkaian bekalan, logistik, guna tanah, teknologi pertanian dan juga harga makanan yang berpatutan. Kita juga perlu berusaha untuk meningkatkan nilai kitaran pertanian dan juga mengurangkan kebergantungan kepada import makanan sebagai persediaan terhadap sebarang krisis di masa hadapan seperti pandemik dan juga pemanasan global.

43. Semasa pelaksanaan PKP, Kerajaan Negeri Selangor telah membantu hampir 8,000 pengusaha di sektor pertanian dengan suntikan dana berjumlah RM3 juta untuk memasarkan produk mereka melalui Program *Selangor Agro Market -Pasar Segar Terkawal (SAM-PST)*. Sejumlah 275 golongan petani telah dibantu untuk pembelian dan memasarkan semula keluaran mereka di 13 lokasi dengan kaedah jualan secara terus, secara dalam talian dan pra-tempahan. Sejumlah RM15 juta nilai jualan telah dicatat di sepanjang program SAM-PST berlangsung.

44. Untuk tujuan ini inisiatif yang dicadangkan adalah seperti berikut:

45. **Pertama: Agrodota Selangor**

Inisiatif AgroData merupakan inisiatif untuk melengkapkan kesenjangan di antara permintaan dan penawaran bahan makanan asas. Inisiatif ini akan dimulakan di sepanjang gugusan Sungai Selangor dengan tanah berkeluasan 5,000 ekar akan ditumpukan untuk usaha memastikan bekalan makanan Negeri Selangor terjamin. Kawasan ini berpotensi untuk dibangunkan sebagai Gedung Simpanan dan Pengeluaran Makanan serta Produk Asas Tani bagi Negeri Selangor dan Lembah Klang.

46. AgroData Selangor juga menawarkan penggunaan teknologi dalam sistem kitaran ekonomi dalam bidang pertanian. Pengumpulan data mengenai permintaan dan peluang pertanian akan diterjemah menerusi usaha penanaman secara teknologi tinggi atau 'Smart Farming' dan aplikasi 'Internet of Things'.

47. Kedua: Inisiatif Jaminan Bekalan Makanan Selangor oleh Perbadanan Kemajuan Pertanian Selangor (PKPS)

48. Perbadanan Kemajuan Pertanian Selangor (PKPS), akan menjadi tunjang untuk mengerakkan inisiatif jaminan bekalan makanan Selangor melalui projek-projek pertanian makanan dan penternakan yang akan mengoptimumkan penggunaan tanah seluas 300 ekar di negeri ini.

Antara langkah-langkah yang telah diambil dan akan dipertingkatkan adalah seperti berikut :-

49. Pertama, menambah pembukaan kawasan-kawasan pertanian di atas tanah-tanah milik Kerajaan dengan mewartakannya serta penggunaan tanah-tanah yang belum dimajukan, dan untuk tempoh terdekat, oleh anak-anak syarikat yang tidak terlibat di dalam sektor pertanian;

50. Kedua, meningkatkan aktiviti pengeluaran di Kawasan Tanaman Kekal Pertanian Makanan (TKPM);
51. Ketiga, memperkasakan Perbadanan Kemajuan Pertanian Selangor (PKPS) di dalam aktiviti pertanian makanan dan seterusnya menjadi peneraju utama sektor pertanian makanan di Negeri Selangor;
52. Keempat, meningkatkan jumlah insentif-insentif kepada agropreneur seperti insentif input-input pertanian, baka-baka ternakan serta peralatan khususnya golongan nelayan
53. Kelima, menggiatkan kaedah pertanian moden seperti fertigasi, hidroponik dan akuaponik, projek tanaman bertingkat dan penggunaan teknologi seperti dron, sensor dan aplikasi dalam talian.
54. Secara keseluruhannya, untuk menjayakan Program Keselamatan Bekalan Makanan kita peruntukkan sebanyak RM50 juta.
55. **Ketiga, Selangor Digital E-Supply Chain (SELDEC)**

56. Inisiatif Selangor Digital E-Supply Chain (SELDEC) adalah bertujuan untuk menyediakan platform pasar dalam talian terutama sekali kepada usahawan luar bandar dalam pelbagai bidang termasuk pertanian, penternakan, perikanan dan industri desa untuk memasarkan produk mereka secara terus kepada pengguna.

57. Inisiatif SELDEC yang diterajui oleh Selangor Industrial Corporation (SIC) ini akan menggabungkan agensi-agensi pembangunan usahawan seperti Koperasi HIJRAH untuk mengurangkan jurang akses terutama sekali kepada usahawan luar bandar terhadap ekosistem pasaran atas talian.

58. Pembangunan SELDEC juga dilihat sebagai inisiatif bagi memastikan hasil-hasil pertanian dan produk di negeri Selangor mencapai potensi pasaran yang bukan sahaja terhad di kawasan daerah masing-masing, namun dapat dinikmati oleh pengguna yang berada di daerah yang berlainan.

59. Strategi ini bakal menyaksikan, hasil tanaman setiap daerah di negeri Selangor dapat ditempah, dan terlibat dalam sistem jual beli malah juga melalui sistem penghantaran yang efektif. Ini dilihat dapat mengukuhkan ekonomi penduduk atau usahawan setempat yang mempunyai kuasa langsung dalam menguruskan hasil produk mereka terutama sekali penduduk luar bandar serta menembusi perangkap kartel-kartel yang selama ini menyebabkan petani-petani tidak mendapat hasil yang setara dengan keuntungan di pasaran.

60. TONGGAK KEDUA - Kemampanan Ekonomi (Economic Sustainability)

62. Tonggak kedua pula iaitu Kemampanan Ekonomi (*economic sustainability*), penumpuan akan diberikan dalam merencanakan lagi pembangunan hartanah, memastikan pengurusan infrastruktur dan perkhidmatan air yang efisien, mengekalkan keseimbangan dalam aliran tunai Kerajaan Negeri serta peningkatan sistem penyampaian Kerajaan Negeri yang lebih bersifat fleksibel dan mampan dalam pengurusan terimaan hasil.

Antara inisiatif yang dicadangkan adalah seperti berikut:

63. Pertama, Projek Rumah Selangorku Harapan & Projek Rumah IDAMAN

64. Keadaan ekonomi yang kurang memberangsangkan pada ketika ini memerlukan pemangkin untuk memacu fasa pemulihan setelah penularan wabak COVID-19 mula terkawal. Oleh itu, bagi merencanakan semula sektor pembinaan khususnya perumahan, Kerajaan Negeri akan memperkenalkan Insentif Galakan Pembinaan Rumah Mampu Milik (Rumah Selangorku Harapan) Pasca COVID-19 yang dijangka mampu menambahkan unit Rumah Selangorku dengan sasaran tambahan sehingga 60,000 unit iaitu penambahan sebanyak 30,000 unit di pasaran untuk tempoh tiga (3) tahun. Nilai ekonomi yang dijangka akan dijana daripada pembinaan Rumah Selangorku Jenis Khas adalah sebanyak RM7.5 billion.

65. Sebagai langkah untuk menggalakkan pemaju untuk meneruskan pembinaan Rumah Selangorku, Kerajaan Negeri telah bersetuju untuk memperkenalkan **Insentif Galakan Pembinaan Rumah Selangorku** dengan membenarkan Pemaju meminda syarat daripada Rumah Selangorku sama ada Jenis A, Jenis B, Jenis C atau Jenis D kepada satu sahaja iaitu Rumah Selangorku Harapan yang berkeluasan minimum 1,000 kaki persegi pada harga jualan tidak melebihi RM250,000 seunit serta dilengkapi dengan kelengkapan asas rumah seperti penghawa dingin, kabinet dapur, kabinet baju dan pemanas air.

66. Dijangkakan melalui Insentif ini, Kerajaan Negeri akan mendapat sekurang-kurangnya sebanyak lebih daripada 3,000 unit Rumah Selangorku dengan nilai hartanah sebanyak lebih RM750 juta **secara percuma** sehingga tahun 2023.

67. Dalam memastikan pelaksanaan insentif ini, Kerajaan Negeri tidak akan mengabaikan golongan B40 khususnya golongan yang kurang berkemampuan serta sukar untuk mendapatkan pembiayaan untuk memiliki rumah tersebut, Kerajaan Negeri telah bersetuju untuk memperkenalkan “**Skim Smart Sewa to Ownership (2STAY)**”.

68. Secara amnya peserta di bawah program “**Skim Smart Sewa Kemudian Beli (2STAY)**” ini akan melalui 2 Fasa iaitu tempoh penyewaan di bawah Skim Smart Sewa (minimum 2 tahun sehingga maksimum 5 tahun) dan tempoh pemilikan di bawah ‘Rent to Own’. Selepas tamatnya tempoh penyewaan 5 tahun, penyewa akan diberikan pilihan sama ada untuk membeli/ memiliki rumah tersebut atau sebaliknya. Sekiranya penyewa memilih untuk tidak membeli, penyewa tersebut perlu berpindah keluar dengan mendapat balik 30 peratus jumlah bayaran sewa yang terkumpul sepanjang tempoh sewaan di bawah Skim Smart Sewa tersebut.

69. Bagi penyewa yang memilih untuk membeli, penyewa akan menggunakan 30 peratus tersebut dijadikan sebagai bayaran deposit pembelian rumah tersebut di bawah Skim Sewa Milik (Rent to Own), bakinya dijelaskan secara bayaran ansuran bulanan selama tempoh yang akan ditetapkan kelak. Jangkaan harga jualan rumah tersebut adalah pada harga tidak melebihi RM200,000 seunit.

70. Umum mengetahui bahawa masalah pemilikan rumah masih menjadi antara masalah utama rakyat di negara kita. Justeru, projek Rumah IDAMAN merupakan inisiatif oleh Kerajaan Negeri Selangor dengan diterajui MBI bertujuan untuk memberi solusi pemilikan kediaman kepada rakyat negeri Selangor dan seterusnya mencapai Dasar Perumahan Negeri Selangor bagi merealisasikan matlamat “Satu Keluarga Satu Kediaman Yang Sempurna”. Program ini mensasarkan kepada golongan berpendapatan rendah hingga sederhana atau kelompok yang dikenali sebagai B40 dan M40.

71. Pelaksanaan projek Rumah IDAMAN ini bukan sahaja akan menyelesaikan masalah pemilikan rumah kepada golongan B40 dan M40 tetapi ianya juga akan menyumbang kepada pembangunan ekonomi Negeri Selangor seperti penyediaan peluang pekerjaan kepada rakyat Negeri Selangor.

72. Kerajaan Negeri mensasarkan 48 000 unit Rumah IDAMAN akan dibina dalam masa 5 tahun dengan nilai ekonomi berjumlah RM 12 bilion. Projek Rumah IDAMAN yang dikawal selia oleh MBI bermatlamat untuk mengaktifkan semula kitaran ekonomi melalui pemulihan perniagaan yang kukuh dan pertumbuhan peluang pekerjaan.

73. Kedua, Industri Bekalan Air

74. Akses kepada bekalan air yang bersih merupakan satu keperluan yang sangat penting di dalam kehidupan seharian setiap insan dan industri. Keperluan kepada air bersih oleh rakyat adalah merupakan keperluan asas yang tidak boleh dinafikan.

75. Dalam usaha bagi menjamin setiap rakyat mendapat hak kepada air bersih, maka perkhidmatan air perlu diuruskan dengan mementingkan ketelusan, kebertanggungjawaban dan efisien.

76. Pengurusan Air Selangor Sdn Bhd (Air Selangor) yang merupakan pemegang lesen tunggal bagi penyediaan perkhidmatan air di Negeri Selangor, Wilayah Persekutuan Kuala Lumpur dan Putrajaya menerajui industri perkhidmatan air dalam usaha untuk bersama-sama mempertingkatkan dan memperkasakan industri bekalan air setanding dengan operasi bekalan air di negara maju.

77. Bagi mencapai matlamat tersebut, Air Selangor telah merangka Pelan Perniagaan (Business Plan) jangka pendek bagi tempoh tiga (3) tahun dan jangka panjang bagi tempoh tiga puluh (30) tahun. Untuk ini, Air Selangor merancang untuk menerbitkan Sukuk Kelestarian Air Selangor di bawah rangka Sukuk Pelaburan Mampan dan Bertanggungjawab (Sustainable and Responsible Investment Sukuk, SRI). Nilai Sukuk yang akan diterbitkan akan berjumlah sehingga RM10 bilion dengan tempoh matang antara 1 hingga 20 tahun.

78. Hasil daripada penerbitan Sukuk Kelestarian Air Selangor akan digunakan untuk membiayai projek infrastruktur air yang mesra alam antaranya menambahbaik fasiliti bekalan air sedia ada seperti 8 buah empangan, 33 loji rawatan air, paip sepanjang 28,713km, 1,577 kolam takungan dan 653 rumah pam. Di samping itu, pelaburan tersebut juga akan digunakan untuk pembangunan projek-projek baru seperti Pembangunan Loji Rawatan Air Sg Rasau dan Pembangunan Loji Rawatan Air Labohan Dagang Fasa 2.

79. Adalah dianggarkan secara keseluruhan pelaburan yang akan terlibat bernilai sebanyak RM35.41 bilion untuk tempoh sepanjang 30 tahun manakala unjuran pembangunan untuk tahun 2020 adalah sebanyak RM429 juta dan bagi tahun 2021 diunjurkan sebanyak RM3.2 bilion.

80. Ketiga, Selangor *E-Kitchen*

81. Pada 8 April 2020, Kerajaan Negeri Selangor telah mengumumkan Inisiatif Selangor E-Kitchen yang diasaskan dengan kerjasama Grab dan penubuhan Platform Selangor (PLATS). Inisiatif ini adalah 'game-changer' dan merupakan inisiatif digitalisasi perniagaan agar ekonomi negeri dapat memberi penciptaan nilai baru kepada masyarakat. Inisiatif ini membantu penjaja/ peniaga kecil untuk terus beroperasi secara dalam talian bagi memperluaskan akses pasaran.

82. Inisiatif ini mensasarkan kepada Penjaja / Peniaga kecil (PKS Mikro) di dalam industri makanan dan minuman (F&B) di sekitar Selangor yang tidak mempunyai akses perniagaan secara dalam talian.

83. Selangor E-Kitchen telah berjaya membantu 133 usahawan dengan jumlah jualan mencecah RM 1.5 juta. Kerajaan Negeri telah bersetuju untuk meneruskan inisiatif Selangor E-Kitchen dan PLATS dengan matlamat 1,000 usahawan dan sasaran nilai jualan berjumlah RM 12 juta.

84. Inisiatif E-Kitchen Selangor 2.0 juga akan diperluas ke perkhidmatan barangan runcit, restoran, farmasi dan produk usahawan Selangor.

85. Keempat. Inisiatif Pelaburan WAAQAF

86. Wakaf merupakan suatu cabang dalam bidang muamalat yang selaras dengan ciri-ciri *murunah* (fleksibiliti) dalam perundangan Islam terutamanya di dalam aspek yang melibatkan kemaslahatan ummah.

87. Inisiatif Pelaburan WAAQAF bakal dilaksanakan menerusi usahasama MBI dan Perbadanan Wakaf Selangor yang bertujuan untuk memperkasakan ekonomi ummah ataupun penduduk Negeri Selangor. Perlaksanaan pelaburan wakaf dipercayai mampu mengatasi kemiskinan bandar dan pengurangan beban kos sara hidup ataupun penghapusan hutang isi rumah.

88. Inisiatif Pelaburan Wakaf ini akan dimulakan dengan dana permulaan berjumlah RM 50 juta. Dana ini akan dilaburkan menerusi mekanisme pelaburan yang patuh Syariah, pelbagaian pilihan pelaburan serta pengurusan risiko yang cekap menerusi jaminan pengekalan modal aset wakaf merupakan antara faktor yang penting bagi memaksimumkan pulangan pelaburan wakaf. Hasil pulangan ini akan diagihkan oleh Perbadanan Wakaf Selangor kepada golongan sasaran.

89. Kelima. Pemberian Baucar Pelancongan

90. Impak Perintah Kawalan Pergerakan (PKP) COVID-19 terhadap sektor pelancongan Negeri Selangor amat dirasai terutamanya kepada pemain industri pelancongan seperti pengusaha hotel, inap desa (homestay), taman tema, syarikat penerbangan, syarikat perkapalan pelancongan dan agensi pelancongan. Dalam usaha menggiatkan semula ekonomi negeri, kita harus memainkan peranan berganding bahu bersama-sama menyemarakkan semula industri pelancongan domestik Negeri Selangor, sekaligus meletakkan Selangor sebagai sebuah destinasi pelancongan yang selamat untuk dikunjungi.

91. Sehubungan dengan itu, Kerajaan Negeri bersetuju untuk menyalurkan subsidi baucar pelancongan bagi kegunaan di premis perhotelan, taman tema dan homestay berlesen di dalam kawasan Pihak Berkuasa Tempatan Negeri Selangor berjumlah RM 2 juta.

92. Kerajaan Negeri juga telah bersetuju meluluskan insentif khas one-off RM1,000 kepada pemandu pelancong, pengusaha homestay dan hos komuniti yang berjumlah RM 600 ribu bagi membantu mereka yang bergantung pendapatan dalam sektor pelancongan.

93. TONGGAK KETIGA - Pembangunan Keupayaan (Capacity Building)

94. Tonggak ketiga, iaitu Pembangunan Keupayaan (*capacity building*), Kerajaan Negeri akan memberi penekanan dengan memacu pertumbuhan industri aeroangkasa sebagai industri yang bernilai tinggi dengan koordinasi tenaga kerja (*talent*) yang terdiri dalam kalangan rakyat Selangor. Inisiatif pembangunan teknologi dan kemahiran aeroangkasa sangat diperlukan dalam fasa pemulihan ini untuk mengukuhkan lagi rangkaian sumber manusia dalam bidang aeroangkasa.

95. Selain daripada itu, Kerajaan Negeri turut memberi fokus dalam peningkatan kemahiran tenaga kerja bagi membantu mereka yang terkesan akibat pemberhentian sektor ekonomi semasa PKP. Kerajaan Negeri meletakkan sasaran untuk menangani masalah pengangguran sebanyak 5% sebagai salah satu strategi pemulihan ekonomi pasca COVID-19 selain daripada menyediakan peluang pekerjaan kepada 10,000 orang dalam tempoh tiga tahun.

96. Pertama, Selangor Kerjaya

Isu kekurangan penawaran pekerjaan sedia ada harus ditangani. Begitu juga pengangguran yang dijangka akan meningkat pasca perebakan COVID-19 yang mengganas. Melalui Selangor Kerjaya, sistem *profiling* dan pangkalan data yang mengambil kira kesesuaian minat, keperibadian, kompetensi dan kemahiran tenaga kerja di Selangor akan dapat memadankan permintaan industri dan mengisi kekosongan jawatan serta mengurus bakat rakyat Selangor dengan lebih tepat.

97. Ini bakal memanfaatkan 10,000 modal insan negeri dalam masa tiga (3) tahun, khususnya mereka yang telah diberhentikan kerja untuk diberi latihan kemahiran baru sesuai dengan Industri 4.0, dengan izin, new skill, upskilling and reskilling. Anggaran kos keseluruhan bagi pelaksanaan Selangor Kerjaya ini adalah sebanyak RM58 juta.

98. Kedua, Rakan Digital Selangor

Digitalisasi memberi ruang kepada masyarakat seluruh dunia melawan ombak besar COVID-19. Namun, tanpa bantuan kepada rakyat yang benar-benar memerlukan, sudah pasti akan ada yang tertinggal. Menerusi Inisiatif Rakan Digital ataupun **Digital Ambassadors**, golongan sasaran seperti warga emas dan perniagaan kecil yang belum celik digital dapat dibimbing untuk turut terlibat dalam sosio-ekonomi digital masa kini.

99. Inisiatif ini akan dilaksanakan bersama universiti-universiti awam dan swasta di Selangor, Badan Bukan Kerajaan (NGO), Kolej INPENS, UNISEL dan Team Selangor. Program ini akan dilaksanakan dengan peruntukan RM 3 juta.

100. Ketiga, Inisiatif Data Internet Selangor

Inisiatif Data Internet Selangor adalah merupakan kerjasama antara Kerajaan Negeri Selangor dan syarikat telekomunikasi untuk menyokong inisiatif digitalisasi bagi mencapai sasaran Negeri Selangor sebagai Negeri Pintar ataupun *Smart State* pada tahun 2025. Inisiatif ini mensasarkan beberapa matlamat:

- Pertama, penjimatan kewangan untuk penggunaan data internet – internet merupakan elemen penting bagi memastikan inisiatif digitalisasi dapat dimanfaatkan.
- Kedua, memudahcara inisiatif digitalisasi dengan menawarkan kemudahan internet tanpa had kepada masyarakat.

- Ketiga, bantuan sokongan untuk mempertingkatkan kemudahan capaian rakyat kepada perkhidmatan dalam talian yang disediakan terutama kepada golongan yang memerlukan seperti kumpulan B40, pelajar luar bandar, guru-guru di sekolah luar bandar serta usahawan wanita.

101. Sebanyak RM 18 juta akan diperuntukkan bagi program ini dan akan memberi manfaat kepada hampir 40,000 penerima di seluruh Selangor.

102. Keempat, Inisiatif Roda Darul Ehsan (RIDE)

103. Selangor merupakan sebuah negeri yang peka dan prihatin dengan trend gig ekonomi yang semakin meluas di Malaysia khususnya dan dunia amnya. Bagi menggalakkan anak muda melibatkan diri dalam bidang ini, Kerajaan Negeri telah memperkenalkan Inisiatif Roda Darul Ehsan (RIDE) dalam Belanjawan 2020 dengan dana awalan berjumlah RM 1 juta.

104. Menyedari penglibatan generasi muda yang tinggi, Kerajaan Negeri akan menambah peruntukan RM1 juta lagi bagi program RIDE menjadi RM2 juta secara keseluruhan dari segi subsidi Lesen Memandu Percuma B2 yang boleh membantu hampir 3,000 orang anak muda dari umur 17 hingga 30 tahun di Selangor. Pendaftaran Program RIDE dijadualkan akan dibuka pada 1 Ogos 2020.

PENUTUP

Tuan Speaker,

105. Pandemik COVID-19 dan kesannya kepada ekonomi telah menunjukkan bahawa kita tidak boleh kembali kepada apa yang kita lakukan sebelum ini. Ini sebabnya 'kebiasaan baharu' ataupun 'new normal' menjadi frasa yang sering kali diungkapkan.

106. Kebiasaan baharu ini bermakna harus berlakunya perubahan dari segi cara kita menjual dan membeli barang, menjalankan perniagaan, pergi dan pulang dari sekolah, berinteraksi antara kawan dan keluarga serta bergerak dari satu tempat ke tempat yang lain.

107. Namun, kebiasaan baharu juga mendesak kita semua untuk mengubah cara kita berfikir mengenai ekonomi dan gaya hidup kita dan menjawab persoalan penting, "Apa masa hadapan kita pasca COVID-19? ***What is our post-COVID-19 society going to look like? And how do we plan to get there?***"

108. Dalam menjawab persoalan ini, sudah pasti pandangan kita mengenai ekonomi tidak dapat kembali kepada biasa dalam menghadapi krisis sebegini yang begitu besar.

109. Berdepan dengan cabaran ekonomi The Great Depression yang bermula pada 1929, Presiden Amerika Syarikat Franklin D. Roosevelt mengumumkan dasar ***The New Deal*** yang dilihat amat revolusioner pada tahun 1933, dan berjaya menyelamatkan ekonomi Amerika Syarikat dan dunia yang amat terkesan dengan pasaran saham Wall Street yang merudum.

110. Pada waktu itu, Roosevelt berkata, dengan izin, “***No country, however rich, can afford the waste of its human resources. Demoralization caused by vast unemployment is our greatest extravagance. Morally, it is the greatest menace to our social order.***”

111. Bagi saya, pasca COVID-19 jika tidak ditangani dengan berhemah, berkemungkinan menjurus kita kepada ***The Great Depression***. Pakar ekonomi terkenal Mariana Mazzucato menyeru tindakan yang sewajarnya diambil oleh kerajaan. Antara cadangan yang beliau lontarkan adalah:

112. Pertama, memikirkan semula hubungan simbiotik kerajaan dan pihak swasta ataupun *public-private partnership*. Sebagai hubungan yang rapat dan berjangka panjang, adakah hubungan ini akan bersifat *mutualistic*, *commensalistic* atau *parasitic*?

113. Kedua, beliau mengetengahkan konsep suntikan fiskal teknologi hijau.

114. Ketiga, menukar paksi ekonomi dari pendekatan pemegang saham kepada pemegang taruh ataupun **shareholders to stakeholders**, di mana pandemik COVID-19 telah membuktikan dasar dan pembiayaan kerajaan dapat menggerakkan pembiayaan sektor swasta.

115. Antara aspek lain yang harus kita amati adalah nasib para pekerja yang hilang kerja akibat digitalisasi dan peningkatan automasi. Sementara kita pantas melaksanakan agenda digitalisasi dan negeri pintar, wajar kita menilai risiko yang disebut sebagai 'technological trap' terhadap negeri serta rakyat Selangor.

116. Kini, pakar-pakar ekonomi telah melontarkan perbincangan berkenaan idea-idea baharu seperti 'Public Wealth Fund' bagi menangani nasib pekerja yang hilang kerja. 'Public Wealth Fund' ini akan digunakan untuk tujuan reskilling dan upskilling pekerja, menangani isu perubahan iklim ataupun climate change, dan merapatkan ketaksamaan ekonomi.

Ini harus menjadi perbincangan yang melibatkan "*Whole of government and whole of society approach*" seperti yang kita lakukan dalam menghadapi wabak COVID-19.

117. Mungkin kita harus memikirkan sumber pendapatan alternatif kepada kerajaan seperti **inheritance tax** harus menjadi pertimbangan negara sebagai langkah ke arah mengimbangkan kesenjangan pendapatan ataupun **income disparity** sekaligus membantu kerajaan mengagihkan kekayaan negara dengan hemah dan saksama.

118. Dalam pada itu, saya ingin menyatakan komitmen penuh Kerajaan Negeri Selangor memulihkan ekonomi, memulihkan kesenjangan pendapatan antara yang kaya dan miskin, memulihkan kesejahteraan dan memulihkan keadilan supaya Selangor terus kekal sebagai ***Malaysia's economic reactor***.

119. Tanpa pelan pemulihan ekonomi yang kukuh, *demand* ataupun permintaan pasaran akan berkurang sekaligus menyebabkan kesenjangan pendapatan antara yang kaya dan miskin meningkat.

120. Detik pasca COVID-19 adalah saat penting ataupun ***“the make-or-break moment”*** bagi golongan berpendapatan pertengahan dan semua yang sedang berjuang menghala ke taraf golongan berpendapatan pertengahan.

121. Sebelum ini, teknologi membuka pintu kepada industri perniagaan untuk melakukan yang lebih dengan sumber yang kurang. Kini, teknologi telah menjadi sangat asasi dan wajib bagi peniaga untuk terus berniaga dengan selamat sambil menjamin kesihatan mereka.

122. Dengan pengumuman Pelan Pemulihan ini, saya yakin Selangor akan jadi magnet bagi pekerjaan baharu, meningkatkan taraf hidup rakyat dan mengukuhkan ketahanan ekonomi supaya dapat menghadapi cabaran pada masa akan datang.

123. Untuk mengembangkan pelaburan di Selangor, kita harus melabur dalam idea-idea baharu supaya kita meningkatkan keyakinan rakyat negeri serta pelabur dari luar negara untuk meneruskan aktiviti-aktiviti ekonomi.

124. Pada waktu yang sama, Kerajaan Negeri Selangor prihatin terhadap kesusahan yang dihadapi oleh setiap warga Selangor, terutamanya golongan yang amat terjejas dan benar-benar memerlukan.

125. Pandemik COVID-19 dan krisis yang menyusul menunjukkan falsafah "***you're on your own economics***" tidak realistik dan tidak mampu menangani krisis. Malah, kerajaan harus bertanggungjawab memastikan bahawa "***the economic shock absorbers are in place to ensure no one will be left behind***". Dan itulah prinsip yang telah saya terapkan dalam pentadbiran ini.

126. Dan saya memberi jaminan kepada setiap warga Selangor; cabaran ekonomi yang sedang dan akan kita hadapi tidak mudah untuk diselesaikan. Namun kerajaan ini akan bekerja kuat untuk memastikan anda tidak terbiar dan mempunyai segala peralatan yang diperlukan untuk mengharungi cabaran ini dan terus berjaya.

TAMAT